

Jasmin Skorupan, gradski vijećnik u GV-u Sarajevo i vijećnik u Općinskom vijeću Stari Grad Sarajevo

Predmet: Demant na netačne tvrdnje koje je iznio g. dr. Dragan Stevanović u emisiji Centralni dnevnik na Face TV-u 02.04.2021. godine

Poštovani,

Upućujem demant na netačne tvrdnje koje je g. dr. Dragan Stevanović sinoć iznio u emisiji Centralni dnevnik, a u kojima tvrdi da su mi upućene prijetnje prije održavanja sjednice, na kojoj se birao predsjedavajući Gradskog vijeća Sarajeva.

Ušao sam u Gradsko vijeće kao samostalni vijećnik, prema tome, glasam samostalno i prema svom ličnom izboru, bez uticaja bilo kog pojedinca ili političke partije. Glasanje je tajno i ja nikada nikome nisam rekao kako ću glasati, niti kako sam glasao i za koga, ni prije glasanja, ni poslije glasanja, a gospodin dr. Dragan Stevanović je izjavio: "Skorupan je dan ranije, dva, nisam imao prilike više da ga vidim, javno rekao da mu se prijeti poslovnim prostorom i sestrim stanom." Također je rekao da sam dan prije izjavio da neću glasati jer sam pod stalnim pritiskom. Ovo je jedna velika neistina, a tome svjedoči i činjenica da ja uopšte i nemam sestru. Što se tiče poslovnog prostora, ja sam već 12 godina zakupac isključivo jednog poslovnog prostora u Starom Gradu i uredno plaćam kiriju, te ne vidim osnov za bilo kakvu ucjenu.

Želim ovom prilikom javno da kažem da g. mr. Ibrahim Hadžibajrić nikada nije vršio pritisak na mene vezano za predmetno glasanje. Što se tiče mog političkog djelovanja, posljednje četiri godine u Starom Gradu djelujem u većini sa g. mr. Ibrahimom Hadžibajrićem, tj njegovom strankom NBL, a sada NES. Uvijek smo imali odličnu saradnju i zajedno smo radili na projektima za dobrobit građana ove opštine.

Svakodnevno se u medijima iznose uvrede i optužbe od strane raznih političkih partija i lidera na račun mene, moje porodice, spominju mi majku, a ništa od onoga što se govori nema veze sa istinom. Pozivam sve one koji iznose neistine o meni da to prekinu. Moja osnovna ljudska prava su ugrožena, reputacija mene i moje porodice je ugrožena zbog navedenog i dostavljam ovaj demant sukladno članu 8 Zakona o zaštiti od klevete FBiH s nadom da ćete isti objaviti.

Već duže vrijeme u javnost se iznose netačne tvrdnje koje se vežu za moje ime i spominju prijetnje kojima sam navodno bio izložen, a što je i g. dr. Stevanović sinoć rekao u više navrata. Želim skrenuti pažnju javnosti da ovako lukavi postupci iskusnog političara prema samostalnom vijećniku, zasnovani isključivo na čaršijskim pričama, bez ikakvih dokaza, svjedoče o tome koliko je u današnjem vremenu lako manipulirati javnim mnjenjem.

U Sarajevu, 03.04.2021.

Jasmin Skorupan

